

Na osnovu člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06) i člana 32. Statuta Općine Velika Kladuša („Službeni glasnik Općine Velika Kladuša“, broj: 12/11), Općinsko vijeće Općine Velika Kladuša na _____ redovnoj sjednici, održanoj _____ . godine, donijelo je

PRAVILNIK

o izmjenama i dopunama Pravilnika o dodjeli stipendija

Član 1.

Ovim Pravilnikom vrši se izmjena i dopuna Pravilnika o dodjeli stipendija („Službeni glasnik Općine Velika Kladuša“, broj: 01/18; 11/18).

Član 2.

U članu 6. stav 1. mijenja se i glasi:

“Svi kandidati za stipendiju za deficitarna zanimanja, koji nisu ostvarili stipendiju po tom osnovu, imaju mogućnost da stipendiju ostvare po osnovu socijalnog statusa, kao kandidati iz člana 3. tačka i.”

U članu 6. stav 2. mijenja se i glasi:

“Sve prijave kandidata koji konkurišu za stipendiju kao socijalni slučaj i prijave kandidata za stipendiju za deficitarna zanimanja iz stava 1. ovog člana, bit će bodovane neovisno o visini mjesečnog prihoda po članu domaćinstva.”

Član 3.

U članu 7. stav 1. mijenja se i glasi:

“Bodovanje se vrši po osnovu kriterija: uspjeh u prethodnoj godini školovanja, broj članova domaćinstva, studenati bez jednog roditelja, broj studenata iz domaćinstva, broj učenika u osnovnoj i srednjoj školi, mjesečni prihod po članu domaćinstva, godina studija, mjesečnog prihoda domaćinstva, invalidnost roditelja studenata i zdravstveno stanje članova domaćinstva.”

U članu 7. u stavu 1. iza tačke “i” dodaje se nova tačka “j”, koja glasi:

“j) studenti iz porodice u kojoj jedan ili više članova porodice boluju od teške bolesti i nisu sposobni za rad, a nemaju rješenje o invalidnosti

- student čija su oba roditelja teški bolesnici.....20 bodova;
- student čiji je jedan roditelj teški bolesnik.....12 bodova i
- student čiji je član porodice teški bolesnik.....8 bodova.

Pod teškom bolešću iz ovog stava podrazumijevaju se slijedeće bolesti: akutna tuberkuloza, maligna oboljenja, endemska nefropatija, hirurška intervencija na srcu i mozgu, sve vrste degenerativnih oboljenja centralnog nervnog sustava, infarkt (srčani i moždani), oboljenje mišićnog sustava, paraliza i druge teške bolesti određene općim aktom Federalnog ministarstva zdravstva, kao i teške tjelesne povrede.”

U članu 7. stav 3. mijenja se i glasi:

“U prihod domaćinstva računaju se prihodi svih punoljetnih članova domaćinstva ostvareni u zemlji i inostranstvu po osnovu plata, penzija (radna, invalidska i porodična), prihodi od samostalne djelatnosti, prihodi od poljoprivrede, prihodi od imovine, kamata i drugi prihodi domaćinstva.”

U članu 7. iza stav 3. dodaje se novi stav 3a. koji glasi:

“U prihod domaćinstva se ne računaju: naknada za ishranu (topli obrok), naknada za prevoz na posao i sa posla, regres za godišnji odmor, dječiji dodatak, stalne i jednokratne novčane pomoći, naknada za tuđu njegu i pomoć, ortopedski i invalidski dodaci, druge novčane pomoći Centra za socijalni rad, humanitarnih i drugih institucija koje imaju socijalni karakter, prihodi od Biroa rada za slučaj nezaposlenosti, stipendije, subvencije prevoza učenika i druge subvencije.”

U članu 7. stav 4. mijenja se i glasi:

“Iznos mjesečnog prihoda za članove domaćinstva koji samostalno obavljaju djelatnost, ako se ne može utvrditi na osnovu priložene dokumentacije, utvrdit će se u visini prosječno isplaćene neto plate u F BiH, a na osnovu zadnjeg objavljenog podataka Federalnog zavoda za statistiku.”

Član 4.

U članu 15. stav 1. mijenja se i glasi:

“Kandidati iz člana 5. i 6. Pravilnika pored dokumenata iz člana 13. ovog Pravilnika uz prijavu na Konkurs prilažu i jedan od slijedećih dokumenata:”

U članu 15. stav 1. alineja 4. mijenja se i glasi:

“platne liste i/ili odreske od penzije za dva zadnja mjeseca za sve članove domaćinstva koji prihod ostvaruju po osnovu rada ili penzije;”

U članu 15. stav 1. alineja 6. mijenja se i glasi:

“ovjerenu Izjavu o visini prihoda domaćinstva u skladu sa članom 7 ovog Pravilnika”

U članu 15. stav 1. iza alineje 9. dodaje se nova alineja 10. koja glasi:

“Uvjerenje Porezne uprave za nezaposlene članove domaćinstva da nemaju ostvarenih prihoda po osnovu redovnog radnog odnosa.”

Član 5.

Ovaj Pravilnik stupa na snagu danom objavljivanja u „Službenom glasniku Općine Velika Kladuša”.

Obrazloženje

Pravni osnov za donošenje Pravilnika o dodjeli stipendija je sadržan u odredbama člana 13. Zakona o principima lokalne samouprave u Federaciji Bosne i Hercegovine („Službene novine Federacije Bosne i Hercegovine“, broj: 49/06), člana 32. Statuta Općine Velika Kladuša („Službeni glasnik Općine Velika Kladuša“, broj: 12/11) i člana 7. Odluke o stipendiranju studenata u akademskoj 2021/2022. godini („Službeni glasnik Općine Velika Kladuša“, broj: __/22).

Razlozi donošenja Pravilnika o izmjenama i dopunama Pravilnika o dodjeli stipendija su normativno regulisanje pitanja i procedura, koje nisu bila dovoljno jasno precizirane i čija primjena je stvarala problem Komisiji za dodjelu stipendija. U prijedlogu izmjena i dopuna Pravilnika o dodjeli stipendija su uvaženi svi prijedlozi Komisije za dodjelu stipendija, koje je Komisija istakla u svom Izvještaju, nakon provedene procedure dodjele stipendije za akademsku 2020/21. godinu.

Obzirom na iznos od 300.000,00 KM planiranih sredstava za ovu namjenu u Budžetu Općine za 2022. godinu i imajući u vidu činjenicu da je došlo do smanjenja broja studenta sa područja naše Općine, nužno je omogućiti da veći broj studenata ostvari pravo na općinsku stipendiju.

Obrazloženje predloženih rješenja

Član 2. Pravilnika o izmjenama i dopunama Pravilnika o dodjeli stipendija

U Pravilniku o dodjeli stipendija, koji je trenutno na snazi, bilo je propisano da pravo na stipendiju u kategoriji “socijalni slučaj” mogu ostvariti samo kandidati koji imaju prihod po članu domaćinstva manji od 500,00 KM. Ova odredba se nije odnosila na kandidate čije se prijave ne boduju i kandidate za deficitarna zanimanja, osim onih koji nisu ostvarili pravo za deficitarno zanimanje, već su bodovani, kao socijalni slučajevi.

Predloženom izmjenom se briše ova odredba, odnosno prihod veći od 500,00 KM nije više eliminatorni uslov za učešće za učešće na konkursu za dodjelu stipendija Općine Velika Kladuša.

Ovom izmjenom se osigurava jednak tretman za sve kandidate, jer se postojeće ograničenje odnosilo samo za socijalne slučajeve.

Činjenica je da se broj studenata smanjuje svake godine i da zbog ovog ograničenja vjerovatno neće biti dodjeljene sve stipendije planirane Budžetom za 2022. godine. Za prethodnu akademsku godinu po ovom osnovu su odbijene prijave 8 kandidata, a stipendija nije dodjeljena za 150 studenata, nego za 139.

Obzirom na rast troškova života koje ne prate primanja, roditelji sve teže finansiraju studij za svoje djete, iako imaju prihod po članu veći od 500,00 KM mjesečno po članu. Ovo se naročito odnosi na domaćinstva sa dva člana (student i jedan roditelj) ili sa tri člana od kojih samo jedan radi. Tako smo za proteklu akademsku godinu imali slučajeve da su odbijene prijave kandidata koji su imali prihod između 500 i 600 KM po članu, a stipendije su odobravane kandidatima sa znatno većim prihodom po članu za kandidate čiji se prijave ne boduju ili se obrazuju za deficitarna zanimanja. Ova odredba Pravilnika je stavljala Komisiju za dodjelu stipendija u situaciju da su morali odbiti prijave kandidata bez jednog roditelja ili samohranog roditelja, a odobravati stipendije kandidatima u daleko povoljnijem socijalnom statusu.

Članom 3. Pravilnika o izmjenama i dopunama Pravilnika o dodjeli stipendija predlažu se izmjene člana 7. Pravilnika o dodjeli stipendija, a odnose se na bodovanje socijalnog statusa za članove porodice koji boluju od teške bolesti i nisu sposobni za rad, a nemaju rješenje o invalidnosti. Izmjenom i dopunom Pravilnika se također preciznije definiše šta se računa u prihod domaćinstva, u smislu ovog Pravilnika i koji prihodi domaćinstva se ne računaju u prihod domaćinstva.

U dosadašnjoj praksi Komisija za dodjelu stipendija je u više navrata nailazila na slučajeve da se radi o roditeljima ili članovima domaćinstva kandidata za stipendiju, koji su teški bolesnici i nesposobni su za rad, a nemaju dokaz o invalidnosti. Ove osobe, iako nesposobne za privređivanje, sa velikim troškovima za lijekove i liječenje nisu, kod bodovanja socijalnog statusa, ostvarivale nikakve bodove. Iako ove osobe nemaju utvrđenu invalidnost, obzirom da se radi o najtežim bolesnicima, trebali bi biti bodovani pošto što se radi o teškim bolesnicima, sa velikim troškovima zdravstvene zaštite i nesposobnim za privređivanje.

Da bi Komisija za dodjelu stipendija mogla primjenjivati ovu odredbu u svom radu, navedene su oboljenja na koja se odnosi ova odredba.

Komisiji za dodjelu stipendija je posebno predstavljalo poteškoću u radu utvrđivanje prihoda od plata članova domaćinstva. Naime, u nekim potvrdama, uvjerenjima o visini plate ili platnim listama nekih poslodavaca su iskazani prihodi po osnovu rada, naknade za topli obrok, regresa za godišnji odmor, kao i neke druge naknade, dok kod drugih nisu, koji, ili ne isplaćuju ove naknade ili ih posebno ne iskazuju.

Predloženim izmjenama se u prihod domaćinstva ne računaju naknade iz plate i penzije, kao i stalne i jednokratne novčane pomoći, naknada za tuđu njegu i pomoć, ortopedski i invalidski dodaci, i druge novčane pomoći Centra za socijalni rad, humanitarnih i drugih institucija koje imaju socijalni karakter, prihodi od Biroa rada za slučaj nezaposlenosti, stipendije, subvencije prevoza učenika i druge subvencije.

Problem u radu Komisije su predstavljale prijave kandidata za stipendiju, čiji se roditelj bavi samostalnom djelatnošću, a ne obračunava i ne isplaćuje mjesečnu platu. Predlaže se da, ako Komisija na bazi priložene dokumentacije, ne može utvrditi prihod po ovom osnovu, isti može utvrditi u visini prosječno isplaćene neto plate u F BiH, a na osnovu zadnjeg objavljenog podataka Federalnog zavoda za statistiku.

Izmjene u članu 4. Pravilnika o izmjenama i dopunama Pravilnika o dodjeli stipendija se odnose na dokumentaciju koja se prilaže uz Prijavu na Javni konkurs za dodjelu stipendija.

Predložene izmjene i dopune Pravilnika o dodjeli stipendija će osigurati pravedniju raspodjelu stipendije, a Komisiji za dodjelu stipendija će olakšati rad.

Obradivač:
Služba za upravu, društvene djelatnosti i
zajedničke poslove

Predlagač:
Općinski načelnik